

10 PARLAMENTARIO INDEPENDIENTE

PROPOSICION 21+10

CARLOS GUIAMO

v. 1.0

Nos sistema democratico tin diferente vulneribildad cu como consecuencia un falta di checks and balances adecua. Teoreticamente, poder democratico ta concentra den parlamento, sin mucho 'checks and balances' riba parlamento. Den practica por nota cu poder politico ta concentra den ministerraad, pa motibo cu candidatonan cu mas voto (y poder) den partido ta bira minister, creando un desbalansa y conflicto di interes entre e ministernan y e parlamentarionan cu tin cu controla e ministernan. E situacion cu parlamentarionan, cu tin (entre otro) e tarea pa controla e ministernan, ta dependiente di e mesun ministernan pa nan posicion y (futuro) carera politico, a lo menos ta crea e apariencia di un conflicto di interes.

Na mesun momento partidonan politico practicamente tin un monopolio riba representacion democratico, considerando cu solamente partidonan politico por participa na eleccionnan parlamentario.

E diferente factornan menciona ta crea un sistema den cual ta usual cu entre parlamento y gobierno e interesnan partidario ta surpasa e interes di pueblo y pais. Nos sistema parlamentario ta hopi vulnerabel pa esaki pa motibo di un dependencia y vinculo (partidario) cu ta wordo crea entre gobierno y parlamento.

Un manera pa percura pa miho checks and balances, ta door di haci parlamento funciona mas independiente (politicamente) for di e ministernan. Esaki por wordo realisa door di aumenta nos parlamento cu 10 parlamentario independiente cu ta wordo eligi den eleccionnan separa for di eleccionnan parlametario existente.

Candidatura

Candidatonan pa eleccion di parlamentarionan independiente no por ta miembro di un partido politico. Tampoco nan por tawata miembro of aparece riba un lista politico durante e ultimo 5 aña (cu un minimo di dos eleccion) prome cu e eleccion pa parlamentario independiente.

Eleccion

Parlamentarionan independiente lo wordo escogi door di pueblo den 10 districto. Lo mester defini 10 districto cu un cantidad similar di persona cu derecho di voto. Cada districto lo eligi un parlamentario independiente. Candidatonan mester ta inscribi y biba den e districto cu nan kier wordo eligi.

Pa wordo eligi, un candidato mester logra mas cu mita di e cantidad di votonan valido. Si ningun candidato logra mas cu mita di e cantidad di votonan valido, e dos candidatonan cu mas voto lo participa den un di dos rond di eleccion. Esun cu mas voto den e di dos rond di eleccion lo gana e asiento independiente.

Termino

Eleccionnan pa parlamentario independiente lo tuma luga cada 3 aña. Esaki no lo cambia si un gobierno cay. E terminonan di parlamentario independiente ta sigui cana independiente for di gobierno y eleccionnan parlamentario di partido.

Independiente

Parlamentarionan independiente no ta participa den formacion di un gabinete y no ta vota riba un mocion di desconfiansa. Esaki ta significa cu un gobierno no mester tin confiansa di parlamentarionan independiente pa wordo forma y pa keda na mando. E sosten di un mayoria di e parlamentarionan eligi den eleccionnan di partido ta keda e base di confiansa pa existencia di un gabinete. Asina parlamentarionan independiente ta mantene un posicion independiente, sin forma parti di un coalicion cu ta sostene gobierno, sin necesariamente asumi e rol di opositor, y sin e vinculo y dependencia cu interesnan conflictivo cu nos sistema actual ta crea entre parlamentario y minister. Banda di e diferencia aki entre parlamentarionan independiente y parlamentarionan di partido politico, e diferente tipo di parlamentarionan tin e mesun derechonan. Pa pasa un ley, amienda y mocion, un mayoria di e total lo ta necesario. Gobierno y e fraccion/coalicion cu ta sostene gobierno probablemente lo mester convence otro parlamentario (sea di oposicion of parlamentario independiente) pa yega na suficiente sosten pa pasa ley. Parlamentarionan independiente tambe lo tin e derecho di manda pregunta por escrito, haci peticion pa un reunion, entrega mocion y amienda, entrega ley di iniciativa, eligi y wordo eligi (vice-)presidente di parlamento, vota pa inicia un encuesta parlamentario, etc.

Representa Aruba henter

Mescos cu parlamentarionan di partido, parlamentarionan independiente ta representa pueblo den su totalidad, y no solamente e districto cu a eligi nan. E districtonan principalmente mester wordo considera como un mecanismo pa eligi parlamento independiente y no como e unico parti di Aruba cu parlamento independiente mester representa. Votadonan di e diferente districtonan principalmente mester eligi loke nan ta considera e miho candidato pa fungi como parlamento independiente pa pais Aruba.

Loke si por spera di un parlamento independiente, ta cu e ta bon na altura di e problemanan, necesidadnan y efecto di diferente maneho riba su districto, y vocifera esakinan den parlamento. Esaki ta conta pa parlamentarionan di partido tambe, pero mientras cu no por garantiza cu entre e 21 parlamentarionan di partido tin un representante di cada parti di Aruba, nos por percura cu lo tin un parlamento independiente for di cada parti di Aruba.

Hybrid chamber

E modelo 21+10 por wordo considera un *hybrid chamber*. E ta consisti di elementonan di dos diferente camara, den un solo parlamento. Door di uni e caracteristicanan describi di 10 parlamento independiente hunto cu 21 parlamento di partido escogi a base di proporcionalidad, cu diferente termino, por yega na un parlamento cu un representacion y poder politico balansa. Mientras cu partidonan politico ta y lo keda hunga un rol importante den nos democracia, nan no lo tin un monopolio mas riba representacion democratico den parlamento.

Transparencia

Ningun sistema democratico lo funciona debidamente sin suficiente transparencia. Un di e areanan caminda mester mehora transparencia, ta e funcionamiento di cada parlamento. Pueblo mester por wak facilmente con cada parlamento individual a vota riba cada ley, amenda y mocion, su motivacion pa su votonan, preguntanan cu e parlamento a haci na ministernan, concepto di ley entrega, peticionnan haci pa reunionnan, presencia na diferente tipo di reunion, etc. Esaki lo duna votadonan mas forma pa huzga e funcionamiento di parlamentarionan y yuda votadonan den nan decision durante eleccionnan.

More checks, more balance

Parlamentarionan independiente por percura pa un factor representativo den parlamento sin influencia partidario y independiente for di e periodo di existencia di un gabinete. Na mesun momento ta mantene e cantidad di 21 parlamentario di partido, eligi den eleccionnan proporcional. Asina partidonan politico ta keda ocupa un rol importante den un democracia mas balansa. Di e forma aki, mas cu dos tercera parti di e representacion den parlamento ta keda eligi por medio di proporcionalidad, mientras cu 10 parlamentario independiente ta wordo eligi den un forma directo. Un mayoria di 11 asiento proporcional ta keda suficiente pa forma un gobierno, pero un sosten mas amplio lo ta necesario pa aproba ley. Den practica esaki lo significa, cu un probabilidad halto, cu gobierno y e fraccion/coalicion sosteniendo gobierno lo mester traha hunto cu oposicion y/of parlamentarionan independiente pa yega na suficiente sosten pa pasa ley. Tambe e parlamentarionan independiente por percura pa mas control riba gobierno, sin influencia di partido. E factor independiente aki tambe lo afecta aspectonan 'interno' di parlamento, por ehempel e escogencia pa un presidente di parlamento.

Cu 10 parlamentario independiente nos por trece un balansa den e concentracion di poder politico, percurando pa un democracia mas balansa.



CARLOS GUIAMO
CARLOS@GUIAMO.COM

2018